

DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO CIUDAD EFESO

Use'ela' Pablo guichi ni lao
yaca ben' nao xneza Jesús, yaca
ben' nita' ciudad Efeso

1 Nē'ēdi', Pablo, bdē' Diuzi
nē'ēdi' según ca re'ennē'
huenē' use'ela'nē' nē'ēdi' lao na'a
ži'inē' Jesucristo. Bia' guichi ni
use'ela'n lao le'e ben' nita' ciudad
Efeso. Nacale ben' quie Diuzi.
Nacale ben' nao xneza Cristo
Jesús. ²Rulidza' Diuzi lēnē' ži'inē'
Jesucristo ta huela'iya Jesucristo
le'e cuēchiyaquē' chizi lu'u guicho
laxta'ole.

Tazēla babēla'iya Diuzi ra'o
ta biyeyudyi yedu quie

³Reya'ala' huero Diuzi ben'
že, ben' naca xuzi Señor quiero
Jesucristo. Lao na'a Cristo tazēla
babēla'iyānē' ra'o ta biyeyudyi
yedu quiē cuenda na' yedyinro
guibá. ⁴Tu binecue' yedyi layu ulio
Diuzi ra'o lao na'a Cristo ta gacaro
ben' quienē'. Lēscan' ulionē' ra'o ta
yeži dula' xquia quiero, na' yeyēri
guicho laxta'oro lao Diuzi. ⁵Azio zē
iza una Diuzi yezi'nē' ra'o iyacaro

como ca ži'inē' nun quie nedyē'ēnē'
ra'o lao na'a Jesucristo. Cana' bēnē'
de acuerdo con ca re'ennē' huenē'
quiero. ⁶Quie lena' huero Diuzi
ben' že gaparonē' bala'ana como
dan' naquē' ben' že, ben' bala'ana
quiero. Huero Diuzi ben' že como
dan' zēla bēla'iyānē' ra'o tanun quie
nuelēro ži'inē' tuže. Lega nedyē'ē
Diuzi ži'inē'. ⁷Tanto nedyē'ē Diuzi
ra'o, apte pselanē' ra'o quie dula'
xquia quiero tanun quie guti ži'inē'
lē'ē yaga cruzo para ra'o, cana'
uži'ženē' quiero. ⁸Taže bablu'e
Diuzi nedyē'ēnē' ra'o babzioñe'enē'
ra'o ca naca pensari quiē'. ⁹Na'tera
babzioñe'enē' ra'o tu ta binezi benē'
tiempote. Bzioñe'enē' ra'o ca unanē'
huenē' ise'elē' Cristo. ¹⁰Según cabē'
una Diuzi huenē' cati idyin hora
tu dza zaza'ra, yetupanē' yugulu
ta dyia guibá, len yugulu ta de
lao yedyi layu, ta uca'nnē'n lao
ladyina'a Cristo.

¹¹Tanun quie nuelēro Cristo tuže,
cana' ulio Diuzi ra'o dza na'te
tacuenda gunnē' ra'o ca ta re'ennē'
gunnē' ra'o. Cana' gaca quiero cabē'
pensari bē Diuzi huenē' quiero

dza na'te, porque puro ta nacaré tahuen hue Diuzi. ¹²Na'ra nēto', ben' nēro, ben' nao xneza Cristo, guca quiendo' cana' tacuenda huendo' Diuzi ben' že gapando'nē' bala'ana nun quie naquē' ben' huen gula. ¹³Pero lēscan' le'e, cati babele quie di'idza' li quie Diuzi, cati babele cabē' hue Diuzi re'ennē' gunnē' ra'o yela' neban tuzioli, na'tera barnaole le'e Cristo, anacalēlenē' tuže. Por nun quie bayu'u guicho laxta'ole Bichi Be que Diuzi, lena' rulu'en banacale ben' quie Diuzi. Cana' bē Diuzi según ca unē' huenē' quie Bichi Be quienē' dza na'te. ¹⁴Como dan' bayu'uro Bichi Be quie Diuzi, lena' baržela'adyi'ro gun Diuzi ra'o yugulu cabē' ta unē' gunnē' ra'o cati yedyinro guibá nacaro libre. Caora na' yēbiro Diuzi: "Diuxcalelo' naco' ben' že quiendo'."

Rnaba Pablo lao Diuzi ta uzioñe'enē' yaca ben' nao xneza Cristo

¹⁵⁻¹⁶Quie lena' birusana' rulidza' Diuzi rēpa'nē' diuxcalelo' nun quiele como dan' babeda' dyē'ēdi barnaole xneza xa'nro Jesús, dyē'ēdi idyē'ēle laguedyile, ben' quie Diuzi. ¹⁷Rulidza' Xuzi Diuzi, ben' de yela' huaca quie, ta gacalēnē' le'e tzioñe'ele dyē'ēdi ca naca pensari quienē', lēscan' ta uzioñe'enē' le'e cabē' bē Cristo, bidanē' bēnē' ca mandado bē Diuzi lēbē' dza na'te. ¹⁸Lēscan' rulidza' Diuzi ta useni'nē' guicho laxta'ole cuenda inezile dyē'ēdi ca naca yela' rbeza quiero yezi' Diuzi ra'o yedyinro guibá, ra'o ben' ulio Diuzi dza na'te. Lēscan' rulidza' Diuzi ta tzioñe'ele dyē'ēdi cabē' tadya'a

gula gaca quiero yedyinro guibá gun Diuzi ra'o yela' neban quiero tuzioli, ra'o ben' quienē'. ¹⁹Lēscan' rulidza' Diuzi ta tzioñe'ele quie Diuzi de yela' rnabē'tzegue quienē', birdzioguenē' yela' rnabē' ta gacalēnē' ra'o, ben' quienē'. Blu'e Diuzi de yela' rnabē'tzegue quienē' ²⁰cati psebannē' Cristo beroguē' ga redyin ben' huati, bēnē' mandado cue'nē' zaquē' yebē ga re'nē' guibá. ²¹Bē Diuzi nombrar Cristo ben' rnabē'ra lao yugulu ben' napa yela' rnabē', la'acazi ben' nita' lao yedyi layu, la'acazi ben' nita' guibá, la'acazi ben' nita' na'a, la'acazi ben' zaza'ra. ²²Pca'n Diuzi lao na'a Cristo yugulu ta de lao yedyi layu len yugulu ta de guibá. Lēscan' bēnē' nombrar lēbē' ben' rnabē'ra lao yugulu ben' nao xnezē'. ²³Nacaro ra'o, ben' nao xneza Cristo, tu cue'ro ben' nuelē' Cristo tuže. Con Cristo naya'aro tu cue'ro. Naca Cristo ben' rnabē' lao yugulutero.

Yela' nedyē'ē quie Diuzi yezi'nē' ra'o

2 Dza na'te guca quiele ca quie ben' huati lao Diuzi. Dyin bē dula' xquia quiele, biyu'ule pensari bēle ta rnazin quiele. ²Unaole bēle ca rue yaca ben' nita' lao yedyi layu. Bē quiele quie Satanás, ben' naca xan' bichi be mala, ben' ru'e fuerza yaca ben' birue quie ca na Diuzi. ³Cana' bēcazi ra'o yuguluro dza na'te caora biunaoro xneza Cristo. Bēro ta rnazin quiero, na' bē quiero quie pensari mala quiero. Quie lena' de ga hue Diuzi ra'o castigo huala lēbi ca yaca los demás ben' nita' lao yedyi layu. ⁴Pero taže

beyèchi'la'adyi' Diuzi ra'o. Tanto nedyè'èné' ra'o ⁵bënë' tacuenda gata' yela' neban quiero tuzioli caora cati psebannè' Cristo. Cana' bënë' quiero dza na'te la'acazi nenacaro ca ben' huati, neyu'uro pensari mala unabè' dula' xquia quiero ra'o. Yela' ben' huen quie Diuzi bënë' ta gata' yela' neban quiero tuzioli. ⁶Cana' naca quiero ca quie ben' apseban Diuzi cabè' psebannè' Cristo. Cana' naca quiero yedyinro cue'lèro inabè'lèro Cristo guibá. ⁷Cana' bënë' quiero cuenda ye inezi ben' zaza'ra dza zaza'ra cabè' taže nedyè'èné' ra'o, taže gualènè' ra'o babënë' tahuen quiero, ben' nao xneza Cristo Jesús. ⁸Como taže nedyè'è Diuzi ra'o, cana' bënë' ta gata' yela' neban quiero tuzioli. Cala por nun quie dan' bi huero cuinro, na' gun Diuzi ra'o yela' neban quiero tuzioli, dechan' ta gunzi Diuzi ra'o ca regalo por nun quie ži'inè'. ⁹Como binacan por nun quie dan' bi huero cuinro, na' gun Diuzi ra'o yela' neban quiero tuzioli, quie lena' bide bi huero ta huero cuinro ben' že lao Diuzi. ¹⁰Cana' naca quiero, como dan' ta bē Diuzi banaoro xneza Cristo Jesús banuelèro lēbē' tuže. Cana' bënë' quiero cuenda huero tadya'a cabè' unanè' quiero huero dza na'te.

Baore' chizi guicho laxta'oro por nun quie banaoro xneza Cristo

¹¹Quie lena' reya'ala' yeza'la'adyi'le cabè' guca quiele dza na'. Cala ben' Israel le'e. Bizu tu xēdyidao' cuinle cabè' mandado rue lao ley quie ben' Israel. Quie

lena' biblè'è ben' Israel le'e dya'a, como dan' yugulu ben' Israel bazu xēdyidao' cuinyaquè'. Tanun quie lena' nayaquè' ben' quie Diuzi lējē', na' le'e binuebè'le Diuzi nayaquè'. ¹²Dza na'te nita'le binuebè'le Cristo, bibèle cuenda ben' Israel. Nica nezile ca naca di'idza' bega'nlē Diuzi ben' Israel dza na'te. Nita'le lao yedyi layu binezile chi zu Diuzi, biulezale yeyole guibá. ¹³Pero na'a, banuelèle Cristo Jesús tuže. La'acazi nica nezile chi zu Diuzi dza na'te, na'tera banezile zu Diuzi, banuebè'le lēbē'. Cana' naca quiele como dan' bida Cristo lao yedyi layu, gutinè' lēè yaga cruzo. ¹⁴Cuin Cristo naquè' ben' rbēchitza'o laxta'oro. Dyin quienè' abeyaca yugulu ben' nao xnezè' ca tu yedyizi. Banacaro ca tu yedyizi la'acazi ben' Israel, la'acazi ben' binaca ben' Israel. Lēbē' apquinoguè' yela' rudie laguedyi quiero cabè' ruquino besu zu ruza'aga benè'. ¹⁵Caora cati guti Cristo lē'è yaga cruzo, cana' uleza ley quie Moisés, bira inabè'n ra'o huero mandado quien. Cana' beyue Cristo chopa cue' benè' beyacaro tu cue'zi ben' cubi, ben' nuelè lēbē' tuže. Cana' bënë' quiero caora ulēchitza'ohuè' quiero. ¹⁶Lēscan' caora guti Cristo lē'è yaga cruzo, cana' uleza tazēdi raca entre lao rupa cue'ro. Cana' ulēchitza'ohuè' quiero conlē Diuzi. Beyuenè' ra'o tužezi.

¹⁷Bida Cristo lao yedyi layu, udixogue'nè' benè' xti'idza' Diuzi gudyinè' leyaquè' ca re'en Diuzi cuēchitza'ohuè' guicho laxta'oro. Udixogue'nè' le'e ben' binaca ben'

Israel, ben' biunezi chi zu Diuzi. Lëscan' udixogue'nè' nètò' ben' Israel, ben' nezi zu Diuzi. ¹⁸Dyin bè Cristo racalè Bichi Be quie Diuzi ra'o ta huebè'ro Xuziro Diuzi, la'acazi nacaro ben' Israel, la'acazi nacaro ben' za' yedyi tula. ¹⁹Quie lena' bira nacale ca quie tu ben' za' yedyi zitu', ben' bdyin ga binaca yedyi quie, dechan' banadele cuenda lao Diuzi na'a lèle yaca los demás ben' nao xneza Cristo. Banacale familia quie Diuzi. ²⁰Naca quiero ca quie tu yu'u besu de yo. Naca yaca ben' apóstol len yaca los demás ben' profeta ca quie ga rzulao besu. Le'e nacale ca quie yo rucual'jè' besu. Naca cuin Jesucristo ca quie yo belao rbèchiyaquè' ga rzulao bezu. ²¹Lao yo belao, inaro Cristo, rucua' Diuzi yo quie besu dyè'èdi. Rlisè' tu besu dya'a gula ta gaca idao' naca la'iya como dan' idao' quie Cristo na'. ²²Cana' naca quiele, banuelèle Cristo tuže. Quie lena' nacale ca quie tu idao' r nabè'ra quie Cristo. Lëscan' yugulu ra'o ben' nao xnezè', banuelèro Cristo tuže bayu'uro Bichi Be quie Diuzi, yela' na' nacaro ca quie tu idao' r nabè'ra ga zu Diuzi.

Bè Diuzi nombrar Pablo ta tzetixogue'nè' ben' binaca ben' Israel xti'idzè'

3 Quie lena' nètè'di', Pablo, naca' preso dia' lu'u dyiguiba nun quie rdza' ja benè' rguixogui'a xti'idza' Cristo Jesús. Biraxejè' re'enda' gaca huen quiele le'e, ben' binaca ben' Israel. ²Nužela'adya' banezile cabè' ta ulio Diuzi nètè'di' ta quixogui'a le'e quie xti'idzè'

como dan' re'ennè' yedyinle guibá. ³Lëscan' babzioñe'e Diuzi nètè'di' cabè' unanè' dza na'te huenè' quiele. Bibzioñe'enè' ben' tula. Na'tera bzioñe'enè' nètè'di' quie pensari quiè'. Lëpensari quie Diuzi babzua' lè'è guichi ni tu chopá. ⁴Caora bablabale quie di'idza' bzua' lè'è guichi ni, na'tera inezcazile de que nezda' cabè' una Cristo huenè' quiele dza na'te. ⁵Bibzioñe'e Diuzi yaca ben' unita' tiempote cabè' unanè' huenè' quiele. Pero na'a sí, lao na'a Bichi Be quienè', babzioñe'e Diuzi yaca apóstol quienè' len yaca los demás ben' rguixogue' xti'idzè', yaca ben' naca la'iya. ⁶Cani naca ca una Diuzi dza na'te: Chi hue quiele le'e ben' binaca ben' Israel xti'idza' Diuzi, na'tera huela'iya Diuzi le'e, gunnè' le'e yela' neban tuzioli lèbizi ca huela'iya Diuzi nètò' ben' Israel, gunnè' nètò' yela' neban tuzioli. Lëscan' quie lena', nacarèle ben' nuelè Cristo tuže cabè' nètò'. Gun Diuzi le'e baneza ta de guibá cabè' di'idza' bega'nlè Diuzi nètò' ben' Israel dza na'te por nun quie Cristo Jesús.

⁷La'acazi bibi zaca' ta hua' dyin quie Diuzi, bènè' nombrar nètè'di' ta tza'a tzetixogui'a yaca benè' xti'idzè' cabè' unanè' huenè' dza na'te ta gacalènè' ben' nita' lao yedyi layu. Yela' r nabè' quienè' bènè' nombrar nètè'di'. ⁸La'acazi ni lè'èti'zi bibi zaca' ta hua' dyin quie Diuzi cabè' zaca'ra los demás ben' rguixogue' xti'idzè', dechan' ulio Diuzi nètè'di', bènè' cule, use'elè' nètè'di' tzetixogui'a ben' binaca ben' Israel ca naca quie Cristo, naquè' ben' že, biyeyudyi yedu tahuen

huenë' quiero. ⁹Na' bë Diuzi në'ëdi' mandado yexi'idze'na' yugulu benë' ca naca quie pensari quienë' cabë' unanë' huenë' tiempo gula ta gacalënë' ben' binaca ben' Israel. Desde dza na'te nunu ben' gula nezi ca naca quie pensari quië' ca huenë' quie ben' binaca ben' Israel. Cana' naca pensari quie Diuzi, naquë' ben' raca rue yugulute. ¹⁰Cana' bë Diuzi bënë' iyaca tužezi ben' rue quie quienë', ben' Israel len ben' binaca ben' Israel, cuenda ilë'ë yaca ben' rnabë' zu guibá naca Diuzi ben' nayoñe'e yugulute. ¹¹Cana' bë Diuzi, bënë' según ca unanë' huenë' quiero desde tiempo dza na'te. Nun quie lena' use'elë' ži'inë' Jesucristo, ben' naca xa'nro. Conlë lëbë' uya'lao bëyaquë' ca re'en Diuzi gaca. ¹²Tanun quie nuelëro Cristo tuže, cana' de lato hue'lëro Diuzi di'idza' cabë' ru'elëro xuzi žna'ro di'idza'. Biidzebiro bigaquero huadza' Diuzi ra'o. Cana' naca quiero dan' barue quiero quie ži'inë'. ¹³Bidëbile ta raca quia' niga. Uzule pensari dyë'ëdi, como dan' por nun quie ta gaca huen quiele dia' ni redzagalaohua'.

Taže nedyë'ë Cristo ra'o

¹⁴Tanto bë Diuzi tadya'a quiero, redaohueda' rguitzu žiba' laohuë' naquë' Xuzi Señor quiero Jesucristo. ¹⁵Lëscan' naquë' Diuzi Xuzi yuguluro, la'acazi bazuro guibá, la'acazi nenita'ro lao yedyi layu. ¹⁶Rulidza' Diuzi udze'në' fuerza valor lu'u guicho laxta'ole gacalë Bichi Be quienë' le'e. Birdziogue Diuzi fuerza valor quienë' gacalënë' le'e. ¹⁷⁻¹⁸Cana' rulidza' Diuzi

cuenda bayu'ule pensari quie Cristo lu'u guicho laxta'ole, na' inabë'n le'e dyë'ëdi. Lëscan' rulidza' Diuzi ta gacalënë' le'e ta inezile taže nedyë'ë Cristo le'e. Cana' reya'ala' inezile cuenda tziõe'ele le'e, len yaca los demás ben' nao xneza Cristo, de que biyeyudyi yedu quie yela' nedyë'ë quie Cristo para ra'o. ¹⁹Rulidza' Diuzi tacuenda gacalënë' le'e tziõe'ele ca naca quie yela' nedyë'ë quie Cristo para ra'o, la'acazi bisaque' tziõe'elen delu derë'. Cana' rulidza' Diuzi cuenda hue'le lato inabë' Diuzi le'e con ga zuzële du dza du yela.

²⁰Na'ra reya'ala' ulidzaro Diuzi dan' naquë' ben' že. De yela' rnabë' quienë' ta huenë' yugulute. Tažera de hue Diuzi quiero cabë' ta inabaronë' huenë'. Tažera de hue Diuzi quiero cabë' ta racaro pensari huenë'. Conlë ra'o ruelë Diuzi yela' huaca quienë'. ²¹Naca Diuzi ben' že. Reya'ala' ulidza yugulu ben' nao xnezë' lëbë'. Reya'ala' ulidza yugulu ben' rue quie ži'inë' Cristo Jesús lëbë'. Cana' reya'ala' gaca quienë' tuzioli. Amén.

Dyin quie Bichi Be quie Diuzi nacaro tuže

4 Quie lena' du guicho du la'adya' inia' le'e reya'ala' tale dyë'ëdi como dan' ulio Diuzi le'e gacale ben' quienë'. Cana' nia' në'ëdi' dia' lu'u dyiguiba naca' preso nun quie dan' rdza' yaca benë' në'ëdi' rguixogui'a xti'idza' Diuzi. ²Bihuele cuinle ben' že, huele gaxo conlë laguedyile. Gacale ben' žela'adyi', yeyëchi'la'adyi'le laguedyile, idyë'ële laguedyile.

³Huele lato gacalè Bichi Be quie Diuzi le'e ta huele tuže conlè laguedyile, cana' cue' chizi guicho laxta'ole. ⁴Naca yugulu ra'ò, ben' nao xneza Cristo, tu cue'zi ben' nuelè lèbè' tuže. Tuzi Bichi Be quie Diuzi yu'uro yuguluro. Lèscan' como ulio Diuzi ra'ò, tuzi naca yela' rbeza quiero rbezaro yedyinro guibá. ⁵Cani naca quiero: Tuzi Cristo zu neziro naca xa'nro, tuzi xti'idza' Diuzi de neziro nacan ta hue quiero, tuzi bautismo de neziro nacan ta gacaro. ⁶Tuzi Diuzi zu naquè' Xuziro yuguluro. Lèbè' r nabè'nè' lao yuguluro, lèbè' rudè'nè' ra'ò bi dyin quienè' huero yuguluro, lèbè' runnè' fuerza valor de quiero yuguluro.

⁷Pero quie quiero nudè' Cristo ra'ò gunnè' fuerza valor bi dyin quienè' huero. ⁸Lena' rguixogue'n lè'è guichi la'iya quie Diuzi cani:

Caora beyèpi Cristo ladza zeyonè' bedyinnè' guibá tatula, caora na' blu'en quienè' bènè' gan lao yaca ben' bdie lèbè'.

Caora na' bèla'iya Cristo ra'ò, bènè' ta naca dya'a quiero.

⁹¿Pero bizi ca inaro quie di'idza' gan' rnèn cani: “Beyèpinè' zeyonè' bedyinnè' guibá tatula”? Lena' inaro tanèro uyèzinè' bdyinnè' uzunè' lao yedyi layu. ¹⁰Na'ra lècazè' beyèpinè' zeyonè' bedyinnè' guibá tatula ta inabè'nè' lao yugulu ta naguixu Diuzi. ¹¹Na'tera bènè' laze nudè'nè' ra'ò bi dyin quienè' huero. Nudè'nè' nu ben' gaca apóstol. Nudè'nè' nu ben' quixogue' ca naca quie di'idza' gudyi Diuzi lèjè'. Nudè'nè' ben'

rguixogue' xti'idza' Diuzi cabè' ta pca'n Diuzi quiero ta gata' yela' neban quiero tuzioli. Nudè'nè' ben' rudze' xnezi quie ben' nao xneza Cristo, ben' rusèdi yaca. ¹²Cana' runnè' ra'ò fuerza valor huero bi dyin quienè' re'ennè' huero cuenda gacalèro laguedyiro uzioñe'erojè' ca naca quie di'idza' la'iya quienè' ta inaorayaquè' xneza Cristo mazara. ¹³Cana' ruenè' quiero hasta idyin dza banacaro tuzi ca hue quiero xti'idzè', banacaro tuzi ca nuebè'ro lèbè' raquè' ži'i Diuzi. Cana' gacaro ben' nao du guicho du la'adyi' xneza Cristo, tzu'uro puro pensari dya'a ca pensari yu'u Cristo. ¹⁴Bira naca pensari quiero cabè' naca pensari quie xcuidi'. Bira yetza'ro pensari quiero tu dza tu dza inaoro neza tula. Binacaro ca la'aga' bidyi ta nu'a be rguinun lao nisa. Bira hue'ro lato si' benè' ra'ò yè', ben' re'en uquixi quiero, ben' re'en udze' ra'ò neza tula, neza binaca quie Diuzi. La'acazi inayaquè' nacayaquè' ben' rioñe'e, bigalele quiejè'. ¹⁵Mejorla hue quiero xti'idza' Diuzi edyè'èro benè'. Cana' reya'ala' huero inaoro xneza Cristo, huelèronè' tuže, naquè' xa'nro ra'ò, ben' nao xnezè'. ¹⁶Ta bè Cristo nita'lèro laguedyiro dyè'èdi gacalèro laguedyiro cuenda yuguluro hue quiero xneza Cristo mazara, edyè'èro laguedyiro mazara.

Becubi Cristo pensari quiero

¹⁷Cani nacan cabè' udxogui'a le'e tanun quie Cristo: Bira tale le'e ca rda ben' binuebè' Diuzi, como dan' naojè' yu'ujè' pensari tondo,

pensari bibi zaca' ca naca pensari quie ben' rda ¹⁸lao lato lao chula naca pensari quieyaquë'. Nica neziziyaquë' chi hue' Diuzi leyaquë' yela' neban tuzioli, como dan' yela' yeladyi' quiejë' nacajë' ben' laxta'o zidi. ¹⁹Bira redue'yaquë' bi tamala rueyaquë'. Banue quieyaquë' rueyaquë' tamala. Redaohueyaquë' rueyaquë' con ta rnan quieyaquë'. ²⁰Pero le'e, dyë'ëdi nezile, cala xneza Cristo naole chi ruele cana'. ²¹Chi tali banezile cabë' una Cristo, chi tali banezile nacan tali cabë' unë', ²²quie lena' ruen zi usanla'adyi'le pensari gula quiele. Bira huele ta rnazin quiele, como dan' nacan tamedian gula, baoži'n le'e yë'. ²³Reya'ala' hue'le lato yecubi Diuzi pensari quiele. ²⁴Reya'ala' hue quiele quie pensari ta becubi Diuzi quiele, porque lëpensari na' banacan tuže len pensari quienë'. Chi inaoro lëpensari cubi na', cana' du la'adyi'ro talëro laguedyiro dyë'ëdi, huero puro tahuen.

²⁵Quie lena' bira si'le laguedyile yë'. Puro di'idza' li hue'lële laguedyile, como dan' yuguluro nacaro tu cue' ben' nao xneza Cristo.

²⁶Chi idza'le laguedyile, gapale cuidado ta bihuen xquia quiele. Chi rdza'le laguedyile, tu binegala dza reya'ala' layeyue'žetele laguedyile. ²⁷Bihue'le lato huelë taxi'ibi' le'e huele tamala.

²⁸Chi zu nule rbanle, reya'ala' usanle bira cuanle. Reya'ala' tzu'u'le pensari huele dyin dya'a du guicho du la'adyi'le conlë ni'a na'ale ta gata' quiele, na' gacalële ben' bide quie.

²⁹Biinële di'idza' mala bizinaque ulidzale benë'. Mejorla inële di'idza' dya'a ineyuele leyaquë' hueyaquë' tadya'a huela'iya Diuzi lëjë'. ³⁰Bihuele tamala cuenda na' gaquyëchi' Bichi Be quie Diuzi yu'u'le. Bihuele cana' como dan' dyin quienë' banadele cuenda lao na'a Diuzi yezi'në' le'e yeyole guibá.

³¹Usanla'adyi'le, bira inaya'le laguedyile, bira udiele laguedyile, bira idza'le laguedyile, bira utasi uniole laguedyile. Ni tu ta naca mala bira huelële laguedyile. ³²Mejorla tzu'ulële laguedyile dyë'ëdi, yeyëchi'la'adyi'le laguedyile, si'žele quie laguedyile cabë' baoži'e Diuzi quiele nun quie dan' nuelë tuže len Cristo.

Ni rnan cabë' reya'ala' taro dan' nacaro ben' quie Diuzi

5 Nun quie nedyë'ë Diuzi le'e nacale ži'inë', cana' reya'ala' huele tuže huele ca rue Diuzi. ²Quie lena' reya'ala' edyë'ële laguedyile como ca nedyë'ë Cristo ra'o. Tanto nedyë'ënë' ra'o psedyinnë' cuinnë' gutië' lë'ë yaga cruzo ta yeži dula' xquia quiero. Ca beco' ži'ila' ruti ja benë' ta yeži dula' xquia quie lao Diuzi, cana' bë Cristo gutië' lë'ë yaga cruzo, ta yeži dula' xquia quiero. Ca yo žixi ulë'ëro yaxero taže gula, cana' yaxë Diuzi cabë' bë ži'inë' nedyë'ënë' ra'o.

³Nun quie banacale ben' quie Diuzi, ni tu lasa, ni ledao'zi, bireya'ala' talële nutezi nigula, bireya'ala' huele biti'tezi ta naca tabayatza, bireya'ala' sa'la'adyi'le dumi. ⁴Bireya'ala' hue'lële benë'

di'idza' lè'è, ni di'idza' tonto, ni di'idza' bayatza, porque lèdi'idza' na', bibi zaca'n para le'e. Mejorla ulidzale Diuzi huelenè' ben' že. ⁵Dyè'èdi nezile chi nu ben' nue costumbre rdalènè' nutezi nigula, chi ruenè' biti'tezi ta naca tabayatza, chi rza'la'adyi'nè' dumi, (tuzcazi nacan sa'la'adyi'ro dumi, len ta tzionla'adyi'ro ta naca yo o ta naca yaga), biyezi' Diuzi lèbè' ta yedyinnè' guibá ga r nabè' Cristo len Diuzi. ⁶Bihue'le lato si' benè' le'e yè' hue'lèyaquè' le'e di'idza' tondo inayaquè' le'e binacan mala huele can', porque hue Diuzi castigo huala nu ben' rue cana'. ⁷Na'ra bihuelèle leyaquè' tuže, ni ledao'zi.

⁸Le'e udale lao lato lao chula dza na'te. Pero na'ra nun quie dan' nuelèle Cristo tuže, cana' banayeni' laxta'ole. Quie lena' reya'ala' tale ca ben' nao xneza Cristo, ben' banayeni' laxta'ohue. ⁹Nun quie nacale ben' nao xneza Cristo, ben' banayeni' laxta'ohue, lena' reya'ala' huele puro ta naca dya'a, puro ta naca tali, puro ta yu'u ni'a xnezi lao Diuzi. ¹⁰Udze'le xneze ta huele pensari lèbi ca pensari quie Cristo tacuenda huele ca raxenè'. ¹¹Bihuele ca rue ben' rda lao lato lao chula. Ruejè' ta bibizaca' lao Diuzi. Mejorla uzioñe'ele leyaquè' cuenda tzeni' guicho laxta'oyaquè' bira inaoyaquè' tamala. ¹²Redue'ro huero di'idza' cabè' r uejè' nagachizi. ¹³Pero caora uzioñe'erojè' ca naca tamala ruejè', caora na' inezijè' lega de dula' xquia quiejè', yela' na' bè' tzu'u beni' quie Diuzi guicho laxta'ojè', caora na' yenaojè' xneza Cristo. ¹⁴Quie lena' rguixogue'n lè'è guichi la'iya quie Diuzi cani:

Uletèlebè le'e nita'le naca quiele ca quie ben' nita' rasi, ben' biyu'u pensari.

Ulesuli le'e nita'le naca quiele ca quie ben' huati, ben' biyu'u gracia.

Ulesu listo, porque bazu Cristo useni'nè' guicho laxta'ole.

Cana' rguixogue'n lè'è guichi la'iya.

¹⁵Quie lena' reya'ala' gapale cuidado ca tale huele lao yaca benè'. Bitale huele ca ben' tondozi, pero ulehue ca ben' rioñe'e. ¹⁶Biunitile tiempo quiele. Gacale listo huele tahuen, porque yugu dza de tamala.

¹⁷Bihuetondole. Udze'le xneze ta inezile ca re'en Cristo huele.

¹⁸Bihuele hue'e como dan' lena' udyiagui'n pensari quiele. Mejorla hue quiele cabè' mandado rue Bichi Be quie Diuzi le'e. ¹⁹Hue'lèle laguedyile di'idza' con cabè' rnan lè'è guichi Salmos ga yu'u di'idza' la'iya quie Diuzi. Lèscan' reya'ala' gulale himnos len cantos ta naca quie Diuzi. Cana' reya'ala' huele, huele Cristo ben' že du guicho du la'adyi'le. ²⁰Reya'ala' ulidzale Xuziro Diuzi yèbilenè' xcalelo' por nun quie dan' racalènè' le'e runnè' ta rdzioguele. Cana' huele uzètöle lao xa'nro Jesucristo.

**Ni rguixogue'n cabè' re'en
Diuzi huelèro familia quiero**

²¹Huelèle laguedyile ben' nao xneza Cristo tuže, porque nacale ben' rapa Cristo bala'ana.

²²Quie ja nigula bazulè be'mbyu, reya'ala' uzujè' di'idza' bi mandado rue be'mbyu quiejè' lèjè' como ca quie mandado rue Cristo. ²³Cana' reya'ala' hue yaca nigula como

dan' r nabè' be'mbyu ina' uhuianè'
nigula quiè' cabè' r nabè' Cristo
ina' uhuianè' yaca ben' nao xnezè'.
Naca Cristo ben' bapte psela ra'o,
gutinè' lè'è yaga cruzo ta yezi dula'
xquia quiero ra'o, ben' nao xnezè'.
²⁴Como ra'o, ben' nao xneza Cristo,
reya'ala' uzuro di'idza' ca mandado
rue Cristo ra'o, lèscana' quie nigula
bazulè be'mbyu, reya'ala' uzuè'
di'idza' ca mandado rue be'mbyu
quiè' lèbè'.

²⁵Na'ra quie ja be'mbyu bazulè
nigula, reya'ala' edyè'èjè' nigula
quiejè' cabè' nedyè'è Cristo ra'o,
gutinè' lè'è yaga cruzo ta yezi
dula' xquia quiero. ²⁶Cana' bè
Cristo quiero cuenda gacaro ben'
naca la'ya. Conlè nisa len xti'idzè'
udibinè' guicho laxta'oro, udubè'
dula' xquia quiero. ²⁷Cana' bè
Cristo quiero cuenda idyinro ra'o,
ben' nao xnezè', laohuè' nacaro
ben' babeyèri guicho laxta'ohue
dyè'èdi. Ta bè Cristo bènè' quiero
binaparo dula' xquia, bibi tamala
de quiero, nacaro ben' naca la'ya,
ben' babeyažo duže dula' xquia
quie. ²⁸Quie lena' reya'ala' edyè'èle
gapale cuidado nigula quiele cabè'
nedyè'èle gapale cuidado cuinle.
Chi edyè'èle gapale cuidado nigula
quiele, lena' huanita'le dyè'èdi,
gacalèle cuinle. ²⁹Cabè' nedyè'èro
cuinro naparo cuidado cuerpo
quiero, cana' nedyè'è Cristo ra'o
napè' ra'o cuidado. ³⁰Cana' rue
Cristo quiero como dan' nacaro ben'
quienè', nuelèro lèbè' tuže conlè
yaca los demás ben' nao xnezè'.
³¹Lèscan' naca be'mbyu lènè' nigula
quienè' tuzi. Cana' rguixogue'n
lè'è guichi la'ya quie Diuzi cani:

“Reya'ala' usan be'mbyu xuzi žnè'è
gacalènè' nigula quiè' tuže. Cana'
banaca quiejè' ca quie tuzi bdyigo'.”
Cana' nan lè'è guichi la'ya.

³²Nezda' nacan zèdi ta tzioñe'ero
cabè' nacan, pero cabè' rnia' niga,
nacan tu ejemplo cabè' naca quiero
lèro Cristo. Nacalèronè' tuzi. ³³Quie
lena' inia' le'e tatula de quie
reya'ala' edyè'èle gapale cuidado
nigula quiele cabè' nedyè'èle gapale
cuidado cuinle. Lèscan' quie yaca
nigula, reya'ala' gapajè' bala'ana
be'mbyu quieyaquè'.

6 Ni re'enda' inia' le'e tu
di'idza' quie yaca xcuidi'
cabè' reya'ala' hueyacabi'. Reya'ala'
galeyacabi' quie xuzi žna'yacabi'
como dan' cana' re'en Diuzi
hueyacabi'. ²Ca naca mandamiento
udixu Diuzi dza na'te rguixogue'n
cabè' reya'ala' huero quie xuzi
žna'ro, lèscan' rguixogue'n ca naca
di'idza' bega'nlè Diuzi ra'o chi
hue quiero di'idza' unanè'. Quie
lena' nan lè'è guichi la'ya caniga:
“Reya'ala' gapale bala'ana xuzi
žna'le. ³Chi gapale bala'ana xuzi
žna'le, na'ra gaca huen quiele sule
zidza lao yedyi layu.” Cana' nan
lè'è guichi la'ya quie Diuzi.

⁴Lèscan' rnia' le'e, ben' naca
xuzi xcuidi', bihuele costumbre
utza'le ži'ile. Mejorla usegulale
ži'ile dyè'èdi, tilaleyacabi' caora
hueyacabi' tamala cuenda
gacayacabi' ben' de pensari.
Reya'ala' uzioñe'eleyacabi' cuenda
inaoyacabi' xneza Cristo.

⁵Lèscan' rnia' le'e, ben' nada'o
reya'ala' uzule di'idza' ca mandado
hue xa'nle le'e dza rdale lao yedyi
layu. Reya'ala' gapale xa'nle

bala'ana, reya'ala' uzule di'idza' cabè' rnanè' du guicho du la'adyi'le ca quie ben' ruzu di'idza' cabè' rna Cristo.

⁶Cana' reya'ala' huele la'acazi zu xa'nle rna'nè' le'e, la'acazi bizunè' ina'nè' le'e. Huele mandado cabè' rue xa'nle le'e, no solamente dan' re'enle yega'nle huen laohuè', pero lëscan' dan' nacale ben' quie Cristo, ben' rue quie ca re'en Diuzi du guicho du la'adyi'.
⁷Cana' du la'adyi'le huele dyin quie xa'nle. Bihuele pensari chi dyin quie benè'zi huele, dechan' dyin quie Diuzi. ⁸Pues dyè'èdi nezile ga'acatezi tu tadya'a huero, huaguižu Diuzi ra'o, la'acazi nacaro ben' nada'o, la'acazi benacaro ben' nada'o.

⁹Lëscan' rnia' le'e, ben' naca xan' ben' nada'o, huele tahuen conlè yaca ben' nada'o quiele. Bitila inèlèle leyaquè'. Bigala'adyi'le tuzi Diuzi zu guibá inabè'nè' le'e cabè' inabè'le leyaquè'. Tucazi nacan ca rnabè' Diuzi ra'o.

Reya'ala' uzalero guicho laxta'oro

¹⁰Na'ra, bicha', inia' le'e uzalale guicho laxta'ole nun quie nuele Cristo tuže. Huele tzutzu guicho laxta'ole nun quie naca Cristo ben' de yela' huaca quie. ¹¹Ulehue ca re'en Diuzi huero ta ucuasa ucui'oro cuinro uzalero guicho laxta'oro cuenda bihue xan' taxi'ibi' ra'o gan. ¹²Cana' huele nun quie cala laguedyi benè' rdilalëro, dechan' rdilalëro ben' naca xan' taxi'ibi', rdilalëro ben' rue taxi'ibi' mandado, rdilalëro ben' rnabè' lao lato lao chula. ¹³Quie lena'

ulehue dyè'èdi ca re'en Diuzi huele cuenda huele tzutzu guicho laxta'ole biusanla'adyi'le xneza Cristo caora cati ruelè xan' taxi'ibi' le'e bizinaquezi. Cana' reya'ala' huele cuenda bidzebile hue quiele xti'idza' Diuzi du guicho du la'adyi'le biyeyatile. ¹⁴Chi huele cana', chi huele tali cabè' una Diuzi, lena' gacalèn le'e ca racalè cincho ruquio lè'èle le'e. Chi huele ta yu'u ni'a xnezi quie Diuzi, lena' ucuasa ucui'on le'e cabè' rucuasa rucui'o guíba lata naco soldado ta biichugo espada lèbè'. ¹⁵Sule listo tzirole tzetixogue'le benè' xti'idza' Diuzi cabè' rue soldado ruejè' listo racojè' žabayaquè' ruliojè' zapato. Naca xti'idza' Diuzi ta rbëchin chizi laxta'oro. ¹⁶Pero ta naca belao ta huele, reya'ala' sudyi'ilèle Cristo dyè'èdi cuenda bihue xan' taxi'ibi' gan huelèn le'e bizinaquezi. Chi sudyi'ilèle Cristo, lena' huen defender le'e ca rue defender guíba lata zè soldado ta biquido flecha zu gui' lèbè'. ¹⁷Como bapte psela Diuzi le'e, reya'ala' sule puesto ca quie soldado, ben' nuzu casco guichogue ta bibi gaca quie guichonè'. Lëscan' como naca xti'idza' Diuzi ca quie tu espada ta ben Bichi Be quie Diuzi le'e, reya'ala' guxule len sule listo ca quie soldado, ben' nuxu espada. ¹⁸Reya'ala' uzule di'idza' hue quiele cabè' rnia' le'e. Biusanle ulidzale Diuzi. Biusanle inabalenè' gacalènè' le'e. Hue'le lato gacalè Bichi Be quie Diuzi le'e hue'lèle Diuzi di'idza'. Huele listo, biyehuèdile. Ulidzale Diuzi ta gacalènè' yugulu ben' nao xneza

Jesús. ¹⁹Lëscan' ulidzale Diuzi inabalenë' gacalënë' në'ëdi' gunnë' në'ëdi' bi di'idza' hue'lia' benë'. Cana' re'ennan cuenda iyažuga' yuxi'idze'na'yaquë' cuenda tziõe'eyaquë' hue quieyaquë' di'idza' la'ia quie Diuzi. Re'en Diuzi quixogui'ayaquë' ca unanë' huenë' dza na'te use'elë' Cristo ta gata' yela' neban tuzioli para yaca ben' nita' lao yedyi layu, pero cala quie tuzi ben' Israel, lëscan' quie yaca ben' yedyi tula. ²⁰Aose'ela' Diuzi në'ëdi' ta quixogui'a benë' xti'idza'në', na' dia' lu'u dyiguiba niga tanun quie bire'en yaca benë' quixogui'a xti'idza'në'. Ulidzale Diuzi gunnë' fuerza valor quia' quixogui'a benë' xti'idza' Diuzi ca reya'ala' hua'.

Rgapa Pablo ben' ciudad Efeso diuzi

²¹Huedetixogue' Tíquico le'e ta inezile ca raca quia' niga. Dy'ëdi nezile naca Tíquico ben' bichiro, ben' nao xneza Cristo. Du guicho du la'adyi'në' racalënë' nëto' ruendo' dyin quie Diuzi. ²²Quie lena' use'ela' lëbë' detixogue'në' le'e ca raca quiendo' niga cuenda bigaqueyëchi' guicho laxta'ole.

²³Rulidza' Xuziro Diuzi lënë' ži'inë' Jesucristo ta cuëchiyaquë' chizi guicho laxta'ole le'e, ben' rue quie xti'idza' Diuzi. Rulidza'yaquë' ta gacalëyaquë' le'e idy'ële laguedyile sudyi'ilële Cristo.

²⁴Rulidza' Diuzi ta huela'ianë' yugulu le'e ben' nedyë'e Señor quiero Jesucristo tuzioli. Amén.